

वैलिव ज्ञान करव

वेताल पच्चीसी : कथा सरित सागरुक अख हिस्सु

मूल लेखक : सोमदेव पंडित

Story - 23



अनुवाद : म.क.रैना, मुम्बई

## वेताल पच्चीसी : कथा सरित सागरुक अख हिसु

मूल लेखक : सोमदेव पंडित

अंग्रीज्य अनुवाद : सी.एच.टावनी तु एन.एम.प्यंजर

कॉशुर अनुवाद : म.क.रैना, मुम्बई

## त्रोवुहिम कथ

### दरवेशु संज कथ येम्य ग्वडु वदुन ह्योत तु पतु नोचुन

राजु त्रिविक्रमसेन वोत बेयि कुलिस निश वापस। लाश त्रावुन फेकिस प्यठ तु द्राव। लाशि मंज बिहिथ वेतालस वोनुस, 'राजु थोकमुत आसख। अख कथ बोजुनावथ।'

कालिंगाहस मंज छु अख बोड शहर यथ शोभावती नाव छु। अति ओस प्रद्युमन नावुक अख राजु राज करान। शहरस मंज ऑस अख जाय यथ यज्ञस्थल नाव ओस। अति ओस अख अमीर ब्रह्मन रोजान यस यज्ञसोमा नाव ओस। यि ब्रह्मन ओस वीद ज्ञानान। अमिस ज़ाव अख लॅडकु यस देवसोम नाव कोरुख। येलि देवसोम शुराह वुहुर ओस, तस खोत अकि द्वह तफ तु मूद। तसुंद मोल मॉज रूद्य नेचिविस नालु मति रॅटिथ ज़ार करान तु वारयाहस कालस दितुख नु तस अंतिम संस्कारुय करनु।

ऑखुरकार आयि यज्ञस्थलुक्य ज़िद्य तु तिमव समजॉव्य देवसोमुन्य मोल मॉज ज़ि प्रथ चीज़स छु नाश गछान। तिमव दिचु बड्यन बड्यन राजन महाराजन हुंजु मिसालु, यिमन दौलथ ति कॉफी ऑस तु ताकथ ति, मगर ऑखुरस म्वकुलेयि तु अंतिम संस्कार प्योख करुन।

देवसोमुन शव आव शुमशान घाट वातुनावनु। अर्थी पतु पतु आँस्य वारयाह लूख, वदान तु रिवान। शुमशानस नँजदीख ओस अँकिस कुटियायि मंज अख पशुपत जूय रोजान। सु ओस स्यठाह कमजोर। तस ओस सॉरिसुय पानस सूर मँथिथ। मस्तस आसस रेंचि। तँम्य येलि लूकन हुँदि वदनुच आवाज बूज, तँम्य वोन पनुनिस अँकिस शेश्यस पताह करुन जि यि क्या दँलील छि ? शेश्यन मोनुनस नु गछुन तिक्याजि सु ओस कथ ताम कथि प्यठ जूगिस नाराज। जूगिस तु शेश्यस गव पानुवँन्य सख तकरार। शेश्य द्राव अमी सातु कुटियायि मंजु तु गव कोत ताम। जूय त्रोव असुन तु द्राव पानय। सु वोत तथ जायि येति शव थोवमुत ओसुख। शव ओस ल्वकुटिस जवानु सुंद तु लूख आँस्य तथ कुन वुछिथ सख वदान। जूय कोर फॉसलु तथ शवस मंज पानु अचुनस। सु गव अँकिस अंदस कुन तु ह्योतुन सख वदुन। तमि पतु ह्योत तँम्य नचुन। नचान नचान त्रोव तँम्य पनुन पान पथर तु पनुनिस मंत्र बलस प्यठ चाव लँडकु सुंदिस शवस मंज।

अचानक गव लँडकु च्यंतायि प्यठ थोद वँथिथ। तसुंघव आँशुनावव वुछ यि करामथ तु तिम गँयि ख्वश।

जूय युस असली तल अख जोदूगर ओस तु व्वन्य ब्रह्मन लँडकु सुंदिस जिस्मस मंज चामुत ओस, वोन शमशानस प्यठ जमाह लूकन, 'बु ओसुस परलूक गोमुत। तति समख्यव मे भगवान शिव तु तँमी कोरुनस बु वापस जिंदु। तँम्य वोन मे पशुपत जूय बननु तु जूय बँनिथुय रोजुन। अमी छुस बु त्वहि निश अलग नेरान। तोह्य ति गँछिव वापस पनुन पनुन गरु।

लूख द्रायि। जूय तुल पनुन प्रोन शरीर तु सु त्रोवुन अँकिस खयि मंज। पानु द्राव ल्वकुट लँडकु बँनिथ बेयिस अँकिस शहरस कुन।

कथ बोजुनॉविथ वोन वेतालन राजु त्रिविक्रमसेनस, 'वँनिव राजु! तँम्य जोदूगर जूय क्याजि ह्योत ग्वडु वदुन तु पतु लोगुन नचुन?' राजस आँस पताह जि

वेताल छु कथ बोज़ुनॉविथ तु पतु सवाल पृष्ठिथ वख्त गुज़ारान मगर शापु किन्य ओस मजबूर जवाब दिनस ।

तँम्य वोनुस, 'वदुन ह्योतुन अमि खॉतरु तिक्याज़ि तस ओस पनुन सु शँरीर त्रावुन युस तसुंदिस मॉलिस माजि हुंघव अथव बड्योमुत ओस तु येमि किन्य तस ज्ञान तु मंत्र हॉसिल ओस सपद्योमुत । नोचुन अमि खॉतरु तिक्याज़ि तस ओस व्वन्य जवान जिस्म मेलन वोल येमि किन्य नोव ज्ञान हॉसिल हेकिहे वॅरिथ । बेयि जवान बनुन कस करि नु ख्वश ?'

वेतालन बूज़ राज़ सुंद जवाब तु द्राव वापस शुमशानस कुन । राज़ गोस पतय ।

